

auschwitz light

(melodie: bella ciao)

la vita è bella la vita nel cinema
ja ds läben isch schön u d lüt sy blöd u vor allem ds chinopublikum
la vita è bella - roberto benigni
dyni messitsch hout üs alli um:

dä nazi-wahnsinn di gruusige lager
das mit em gas u den öfen un em rouch u di ganzi schöisslechkeit
das chöi mir misse bruuches nümme z wüsse
du produziersch drum auschwitz light

es bitzeli terror e chly reis im viehzug
appäll mit gmöögg u ässä-hüet u marsch im sträflingschleid
paar mönscheschlange - ouge wo plange
meh bruuchts doch nid das tuet scho jedem leid

de dä wirblig pappi u das wackere büebli
si spile wettendass – em gwinner winkt e panzer waau
u süüfzge briegge tuet ds schöne mammi
das isch doch ächt e cooli schou

am schluss isch alles ganz rasch vrby gsy
lue da dr panzer mit de brothers us amerika
u d fröid isch riisig u ds lyde chly gsy
so bhauptet küen üse chino-ma

la vita è bella u mir sy bbüglet
dass so ne schmare sech z los angeles drei oscars holt
doch däm benigni cha niemmer böse sy
dä isch vom zytgeischt-panzer überrollt

i nes paar jahrzähnte wird är – dr benigni – de im ne film verzelle win är im
früelig 99 als geng no agile urkomische kosovo-grosätti zu sym änkubüebli seit:
*lue büebli di serbe u di nato di mache mit üs numen es spil – me seit ihm ds
grosse fahr-ab-u-vrreis-spil – wär sech am schnällschte cha dünn mache gwinnt
sibe mönet gratisferie im hotel europa – avanti büebli avanti!* u nach
sibezätägiger flucht wo im film sibeminutedryzä duuret lande si z italie u traffen
em büebli syni mamma wider u fallen enand um e hals u singe:

la vita è bella la vita è bella
s isch alles halb so schlimm was heit er o mit däm kosovo
u d lüt säge bravo u stürme d chino
u vier fuf oscars git s de sicher o

(1999)